




陽明上篇

陽明大意在經府之別而在經者當屬表證雖有中風能食傷寒不能食之分然邪既犯中焦則又不必辨其風寒營衛但須以太陽證未盡自汗脈緩者可用桂枝湯無汗脈浮者可用麻黃湯少陽證漸見潮熱脈弦浮大而短氣腹滿者可用大小柴胡分提表裏之邪必頭項強几元脈長而大者可用葛根湯大開肌肉以汗之故以經證另自爲篇其府證雖有三陽明之辨而所重尤在能食爲胃強不能食爲胃衰大都能食者皆可攻下但有緩急之殊惟是胃弱不能食者乃有挾虛寒挾熱

結之不同。虛寒則自利發黃嘔噦而脉遲。當用理中。四逆熱結則腹滿譫語不大便而脉濇。當用蜜煎膽導。不可拘於府病爲陽槩用寒下而禁用溫劑也。

陽明病若能食名中風不能食名中寒

風爲陽不能消穀故能食寒爲陰陰不能消穀故不能食並邪入陽明已至中焦營衛交會之處渾然一氣似難分辨惟能食不能食差有據耳。

傷寒三日陽明脉大

陽明氣血俱多故其脉長而大

脉浮大應發汗醫反下之此爲大逆

陽明病脉遲汗出多微惡寒者表未解也可發汗宜桂枝湯

陽明病脉浮無汗而喘發汗則愈宜麻黃湯此二條言太陽之邪初入陽明未離太陽故仍用桂枝湯解肌則風邪仍從衛分而出用麻黃湯發汗則寒邪仍從營分而出矣陽明營衛難辨辨之全藉於脉證風邪之脉傳至陽明白汗已多則緩去而遲在寒邪之脉傳至陽明發熱已甚則緊去而浮在此皆邪氣在經之徵若傳入於府則遲者必數浮者必實矣設不數不實定爲胃虛不勝攻下之證也

陽明病但頭眩不惡寒故能食而欬其人必咽痛若不欬者咽不痛

此胃熱協風邪上攻之證以風主運動故也風邪攻胃胃氣上逆則欬咽門者胃之系欬甚則咽傷故必咽痛宜茯苓桂枝白甘草湯以散風邪祛胃濕若胃氣不逆則不欬咽亦不痛也

陽明病法多汗反無汗其身如蟲行皮中狀者此久虛故也

此胃熱協寒邪鬱於皮膚之證也言久虛者明所以不能透出腠表之故宜用桂枝二越婢一湯主之非謂當用補也



陽明病反無汗小便利。二三日嘔而欬手足厥者必苦頭痛。若不欬不嘔手足不厥者頭不痛。

陽明無汗嘔欬手足厥者得之營衛俱傷而邪熱入深也。然小便利則邪熱不在內而在外。不在下而在上。故知必苦頭痛。仍宜小青龍主之。若不嘔不欬不厥而小便利者邪熱必順水道而出。豈有逆攻巔頂之理哉。

陽明病口燥但欲漱水不欲嚥者此必衄也。

漱水不欲嚥知邪入血分血爲陰故不能消水也。陽明之脉起于鼻血得熱而妄行必由清道出也。

脉浮發熱口乾鼻燥能食者則衄。

能食者知邪不在裏而在經故必咽。

陽明病脉浮而緊者必潮熱發作有時但浮者必盜汗出。

脉浮緊而潮熱者太陽寒邪欲入陽明之府而未入也邪雖未入而潮熱之證預形矣脉但浮而盜汗出者大陽風邪將傳少陽之經而未傳也經雖未傳而盜汗之證先見矣蓋少陽氣血俱少本不主汗以其邪熱在裏蒸蒸陽明而陽明肉腠自固故不得出乘合目時脾氣不運肉腠疎豁則邪熱得以透出所以盜汗雖爲少陽證而實不外乎陽明也。

陽明中風脉弦浮大而短氣腹都滿協下及心痛久
按之氣不通鼻乾不得汗嗜臥一身及面目悉黃小
便難有潮熱時時噦耳前後腫刺之小差外不解病
過十日脉續浮者與小柴胡湯脉但浮無餘證者與
麻黃湯若不尿腹滿加噦者不治

此條陽明中風之證居七八而中寒之證亦居二
三觀本文不得汗及用麻黃湯其義自見也然此
一證爲陽明第一重證以太陽之脉證旣未罷而
少陽之脉證亦兼見是陽明所主之位前後皆邪
不能傳散故也夫傷寒之訣起先惟恐傳經經傳
則變生表邪傳裏消燄津氣也其後惟恐不傳經

不傳經則勢篤虛不能傳邪無從泄也仲景於此
段中特挈不傳之妙理千古無人看出總不識其
所言者爲何事詎知脉弦浮大而氣反短連腹部
滿者邪不傳也脇下及心痛乃至久按之氣不通
者邪不傳也鼻乾不得汗嗜臥表裏俱困乃至一
身及面目悉黃者邪不傳也小便難有潮熱時時
噦胃熱熾盛上下道窮邪不傳也耳前後腫刺之
小差者內邪不傳乃致外挾其血亦不散但其腫
小差也外不解過經十日留連極矣所謂萬物所
歸無所復傳者原爲美事孰知病邪歸之而不傳
反成如此危候耶要知陽明之邪來自太陽去自

少陽所以脉續浮者。與小柴胡湯推其邪。使速達少陽去路也。脉但浮無餘證者。與麻黃湯推其邪。使速還太陽來路也。若不尿腹滿則胃邪內壅。不下行矣。而更加噦。胃氣將竭。愈逆上矣。再有何法。可以驅其邪。而使之傳耶。不然豈有十餘日後無故張皇。反用麻黃之理哉。

食穀欲嘔者。屬陽明也。吳茱萸湯主之。得湯反劇者。屬上焦也。

此條辨嘔有太陽。亦有陽明。本自不同。若食穀欲嘔。則屬胃寒。與太陽惡寒嘔逆之熱證相反。正恐誤以寒藥治嘔也。然服吳茱萸湯轉劇者。仍屬太

陽熱邪而非胃寒明矣。

傷寒嘔多雖有陽明證不可攻也。

嘔多爲邪在上焦總有陽明證戒不可攻。攻之必邪氣乘虛內犯也。設有少陽證兼見亦當從和解例斷不可行攻下法也。

夫病陽多者熱下之則鞭。

陽熱證多則有陽明證見亦屬經證不可下也。不當下而誤下之則陽邪乘虛內陷也。不作結胸則爲痞鞭也。

無陽陰強大便鞭者下之必清穀腹滿。

無陽陰強言其人津液內亡胃中陽氣空虛陰邪

上逆所以痞滿不食此與誤下成痞同意若因其痞而復下之必致便利清穀而腹滿也少陰中風腹滿不食誤下亦有此證然陽明無陽陰強誤下而清穀腹滿可用瀉心湯例治若少陰中風誤下而清穀腹滿者卽用四逆湯恐亦不能挽回也已上俱陽明經證

陽明病欲解時從申至戌上。

上條陽明經證自解候。

傷寒論

卷上

三



陽明下篇

問曰病有太陽陽明有正陽陽明有少陽陽明何謂也答曰太陽陽明者脾約是也正陽陽明者胃家實是也少陽陽明者發汗利小便已胃中燥煩實大便難是也

脾約者其人津液素枯邪熱在太陽時大便即難是也太陽陽明者太陽經邪熱不侯入陽明經而便八胃府也正陽陽明者經邪傳府表邪併裏故云胃家實也少陽陽明者發汗利小便已胃中燥煩實大便難津液耗竭也尚論以陽明經傳少陽經即為少陽陽明非也若經邪傳經則胃中未必

便燥而大便難。如果陽明經傳少陽證。卽當言陽明少陽。不得謂之少陽陽明矣。

陽明之爲病。胃家實也。

問曰。何緣得陽明病。答曰。太陽病發汗。若下。若利。小便。此亡津液。胃中乾燥。因轉屬陽明。不更衣。內實。大便難者。此名陽明也。

問曰。陽明病外證云何。答曰。身熱。汗自出。不惡寒。反惡熱也。

問曰。病有得之一日。不惡寒而發熱者。何也。答曰。雖得之一日。惡寒將自罷。卽自汗出而惡熱也。

問曰。惡寒何故自罷。答曰。陽明居中土也。萬物所歸。



無所復傳始雖惡寒二日自止此爲陽明病也。

本太陽初得病時發其汗汗先出不徹因轉屬陽明也。

傷寒發熱無汗嘔不能食而反汗出濇濇然者是轉屬陽明也。

傷寒轉繫陽明者其人濇然微汗出也。

既濇然汗出則熱除嘔止可知。

脈陽微而汗出少者爲自和也汗出多者爲太過陽脈實因發其汗出多者亦爲太過太過爲陽絕於裏亡津液大便因鞅也。

中風之脈輕微而緩者爲風邪本微汗出少而不

爲過也。傷寒之脉已至於實，卽將去太陽而成可下之證也。况過發其汗，寧無亡津液，大便因鞭，致傳陽明之證乎。

己上統論陽明府證傳受。

陽明中風，口苦咽乾，腹滿微喘，發熱惡寒，脉浮而緊，若下之，則腹滿小便難也。

此雖曰陽明中風，而證俱見傷寒太陽未除之候，但以腹滿一端，知認爲熱入陽明，然終與大實大滿不同。若誤下，則邪愈陷，而腹愈滿矣。小便難者，亡津液也。

陽明病，脉遲，食難用飽，飽則微煩，頭眩，必小便難。此

